

**1277-1277- OFP - Acta Capitulum Generalium Burdigale Celebrati**

In nomine patris et filii et spiritus sancti. Amen.  
Acta capituli generalis Burdigale celebrati  
anno Domini · M° · CC° · LXXVII° ·

Confirmamus has constitutiones. In capitulo de electione prioris conventualis. ubi dicitur. ad electionem prioris conventualis admittantur. addatur. infra vero idem tempus in socium prioris vel in electorem prioris provincialis nullatenus eligantur. Et hec habet · iii · capitula.

Iste sunt approbaciones.

Approbamus has. In capitulo de suffragiis. post illud ubi dicitur. si in via mori contigerit. addatur. idem etiam fiat pro procuratore ordinis in curia Romana; si in procuratoris officio decesserit. Et hec habet · ii · capitula.

Item hanc. In capitulo de ieiuniis. ubi dicitur. in vigilia Iohannis Baptiste. Petri et Pauli. Iacobi. addatur. et beati Dominici. Et hec habet · ii · capitula.

Item hanc. In capitulo de electione prioris provincialis. ubi dicitur. quod si capitulum provinciale ex aliqua causa ad conventum alium transferatur. addatur. que translatio fiat per priorem provincialem vel eius vicarium; de consilio discretorum. Et hec habet · ii · capitula.

Item hanc. In eodem capitulo. ubi dicitur. mori vel amoveri contigerit. addatur. vel extra provinciam esse. durante eius ausencia. Et hec habet · ii · capitula.

Item hanc. In eodem capitulo. post illud ubi dicitur. qui vices provincialis in omnibus optinebit. addatur. si prior illius domus. ubi provinciale capitulum fuerit celebrandum. in provincia presens non exstiterit. et capitulo provinciali quacumque ex causa non interfuerit; simili modo prior illius domus. ubi precedens capitulum provinciale fuerat celebratum. vices prioris provincialis in ipso tantum capitulo in omnibus optinebit. Et hec habet · ii · capitula.

Item hanc. In eodem capitulo. ubi dicitur. prior provincialis provinciam suam visitare curet. deleatur totum quod sequitur usque in finem capituli. et dicatur sic. prior provincialis per se. si poterit. vel per vicarios ydoneos provinciam suam totam teneatur singulis annis visitare. quibus vicariis auctoritatem suam committat. prout sibi videbitur expedire. Et hec habet · ii · capitula.

Item hanc. In capitulo de sollempni celebratione capituli. ubi dicitur. debeat prolongari. addatur sic. capitula etiam provincialia eodem modo infra pretaxatum dierum numerum terminetur. Et hec habet · ii · capitula.

Item hanc. In letania. ubi dicitur. episcopos et priores. deleatur. priores. et dicatur. prelatos. Et hec habet · ii · capitula.

Iste sunt inchoaciones.

Inchoamus has. In capitulo de capitulo provinciali. post illud ubi dicitur. eius excessum referant ad capitulum generale scripto communiter sigillato. addatur sic. singulis vero annis in capitulo provinciali auditis culpis. fiat scrutinium seorsum in conspectu omnium super retencione vel absolutione prioris provincialis cum expressione nominum et officiorum fratrum exprimentium vota sua per diffinitores capituli provincialis. Quod scrutinium statim in eodem capitulo in conspectu omnium publicetur. et sigillis eorundem diffinitorum coram omnibus sigilletur. et per diffinitorem capituli generalis vel eius socium vel per socium provincialis in anno provincialium ad generale capitulum deferatur. Et hec eadem forma scrutini facienda de priore conventuali per subpriorem vel eius vicarium in ausencia subprioris et duos antiquiores in ordine de conventu presentes in capitulo in tractatu eorum. que mittenda sunt ad capitulum. observetur. et sigillo conventus dictum scrutinium statim coram omnibus sigilletur. et per socium prioris ad provinciale capitulum transmittatur.

Item hanc. In capitulo de gravi culpa. ubi dicitur. secundum exigenciam culpe gravius puniatur. deleatur hoc totum et dicatur sic. pena graviori culpe debita puniatur.

Item hanc. In capitulo de electione prioris provincialis. in fine addatur. priores provinciales. cum fuerint absoluti; ad illos conventus pertineant. de quibus fuerant assumpti. nisi per superiores suos aliter fuerit ordinatum.

Iste sunt admoniciones.

Monemus. quod lectores ordinarii in conventibus suis plus legant de textu biblie quam solent. et semper lectio biblie aliis lectionibus premittatur.

Item. Admonemus. quod interdictum factum a magistro ordinis in precedenti capitulo generali Pisis celebrato de non recipiendis alterius religionis professis. secundum formam ipsius interdicti arcus observetur. et priores provinciales sine magna causa recipiendi licenciam non concedant in hiis. in quibus eisdem dispensandi auctoritas est permissa.

Item. In singulis conventibus assignentur tres depositarii per conventum. qui sine licencia prioris vel eius vicarii. recipiendi. ostendendi. seu etiam reddendi deposita non habeant facultatem. nec prior vel eius

vicarius sine ipsis. Quod si aliquem predictorum depositariorum abesse vel impediri contigerit; clavis eius tradatur illi. quem prior vel eius vicarius assignaverit de consilio discretorum. et caveatur semper. ne simul teneat aliquis plures claves. preter autem istam ordinacionem; nullus frater depositum audeat recipere vel tenere.

Item. Priores provinciales et conventuales et eorum vicarii in penitenciis in capitulo iniunctis; sine causa legitima non dispensent.

Item. Constitucio de ingressu mulierum [in] claustrum. oratorium et alias officinas arcus observetur. et qui culpabiles circa hoc inventi fuerint; gravius puniantur.

Item. Constitucio de non recipiendis noviciis sine etate perfecta; diligentius observetur. et in etate sine causa valde legitima nullatenus dispensetur. Quod si aliqui de cetero infra etatem legitimam aliquem receperint vel tali recepioni consenserint cum effectu; sint privati vocibus in recepzione noviciorum quousque per magistrum ordinis vel per priorem provincialem suum et diffinitores provincialis capituli fuerint restituti. et nichilominus qui contra hoc deliquerunt a tempore generalis capituli ultimo Florencie celebrati; · vii · diebus in pane et aqua abstineant. nisi de hoc alias specialiter fuerint puniti.

Item. Ordinamus. quod singulis annis in quolibet capitulo provinciali fiat scrutinium super retencione vel absolucione prioris provincialis et diffinitores recipiant vota fratrum. et ipsum scrutinium statim in eodem capitulo publicetur. et sub sigillis diffinitorum per diffinitorem vel eius socium. vel per socium provincialis in anno provincialium ad generale capitulum deferatur. Idem fiat de priore conventuali receptis votis fratrum per subpriorem vel eius vicarium absente subpriore. et duos fratres qui primitus habitum nostri ordinis susceperunt. et sub sigillo conventus per socium prioris ad capitulum generale vel provinciale deportetur. et si quid huic ordinacioni contrarium hactenus ordinatum fuerit; revocamus.

Item. Ordinamus. quod singulis diebus immediate post matutinas exceptis festis simplicibus et supra; fratres in choro super formas prostrati pro bono statu et conservacione ordinis; dicant psalmum. deus in adiutorium cum letania. qua finita dicatur. kyrie eleyson. pater noster. cum versiculis. post partum virgo. ora pro nobis beate Dominice. memor esto congregacionis tue. salvos fac servos tuos. esto nobis domine turris fortitudinis. et oracionibus. protege domine famulos tuos. concede quesumus omnipotens deus. et ineffabilem misericordiam tuam. et ad ista suffragia fratres. ubicumque fuerint. teneantur.

Item. Ordinatur magister ordinis. quod festum beate Marthe fiat · vi · kalendas augusti. et in calendariis et rubricis de officio inseratur. et officium dicti festi ordinatum per eundem magistrum. socii provincialium ad suas provincias secum ferant. ut in capitulis provincialibus de eo fratribus copia prebeat.

Committimus magistro ordinis ordinacionem studii Parisiensis. et aliorum generalium studiorum. ut ipse de magistris et bacallariis ordinet et disponat. prout generali utilitati ordinis sibi viderit expedire.

Concedimus provincie Polonie · ii · domos versus Russiam collocandas.

Sexto kalendas augusti fiat festum trium lectionum de beata Martha; hoc modo. in vesperis hymnus. huius optentu. etc. gloria patri geniteque proli. etc. ad magnificat antiphona. ista est virgo sapiens. etc. oracio. exaudi nos deus. salutaris noster. etc. ad matutinas hymnus. huius optentu. gloria patri. etc. tria responsoria ultima de communi unius virginis. scilicet. audivi vocem. etc. veni etc. regnum mundi etc. in laudibus hymnus. Ihesu corona. etc. super psalmos antiphona. ista est. ad benedictus antiphona. veni electa mea. etc. in missa officium; gaudeamus omnes in domino. etc. oracio. exaudi nos etc. epistola. mulierem fortem quis inveniet etc. usque ad illum locum. manus suas aperuit inopi. et palmas extendit ad pauperes. inclusive. responsorium. propter veritatem etc. alleluia; veni electa mea etc. evangelium; intravit Ihesus in quoddam castellum. etc. offertorium; filie regum. secreta; accepta sint tibi domine etc. communio; diffusa est gracia in labiis. post communionem; saciasti domine.

De beata Martha. lectio prima. Venerabilis hospita Christi beata Martha de regali exorta progenie. Lazari et Marie Magdalene soror uterina. charitate redundans. castitate pollens; viriles legitur omnino vitasse contactus. Hec hospitalitati semper intenta; ipsum salvatorem mundi frequenter recipere hospicio suo meruit. unde et hospita eius specialiter appellatur. Quo post passionem et resurrectionem in celum assumpto; cum beato Maximino et Lazaro ac sorore. relicta patria et patrimonio satis largo; usque ad Massiliam transfretavit.

Lectio secunda. Post modicum tempus. de Massilia ad Tharasconem se transtulit. ubi drachonem ingentem inveniens. homines et bestias devorantem. et naves transeuntes per Rodanum sepius submergentem. ad clamorem populi plangentis; fiducialiter ipsum adiit. Quem aqua benedicta aspergens. signo crucis contra eum facto. cingulo proprio alligatum; populo tradidit lacerandum. Qui quia Tharascus vocabatur. locus Tharasconensis est appellatus. In hoc loco predicacione sua multos convertit; et religiosarum personarum conventum instituit.

Lectio tertia. Cumque illic per multum temporis gloriosis exemplis. magnisque miraculis coruscasset; obitum suum circiter ante per annum; sibi dominus revelavit. Cui ante diem obitus apprensus; dixit. quia tociens me in tuo hospicio suscepisti; veni electa mea in palacio celi a me suscipienda. eos autem qui ad sepulchrum tuum pro necessitatibus suis accesserint; pro amore tuo exaudiam. In hora vero sepulture

ipsius apprens dominus beato Frontoni apud Petragoras divina mysteria celebranti. vocavit eum. ut sequeretur se ad divine hospite sepulturam. ipsamque sepulture ambo pariter tradiderunt. Quo facto; relicta ibi chirotheca in testimonium rei geste; beatus Fronto rediit ad incepta divina mysteria peragenda. Tu autem etc.

Sic ordinetur in kalendario in rubrica. que incipit · vi · kalendas augusti in fine. Item commemoracio beate Marthe felicis hospite domini nostri Ihesu Christi. sororis beate Marie Magdalene et beati Lazari martyris. cuius transitus in Galliis apud Tharasconem contigit · iiiii<sup>o</sup> · kalendas augusti. sed hic a nobis recolitur.

Capitulum generale sequens assignamus apud Mediolanum in provincia Lombardie. et diffinitores veniant dominica infra octavas ascensionis.

Absolvimus priores conventuales Niciensem. Cistercensem. Valentinum. Aurasicensem. Tharasconensem. Arelatensem. Nemausensem. Albenacie. Pirpignani. Rivensem. Condomiensem. sancti Emiliani.

Absolvimus priorem provinciam Theutonie. et assignamus eum Parisius ad legendum sententias isto anno.